

正

顯密圓成佛心要集卷下

五臺山金河寺沙門道啟集

大明代藩分封蒲坂山陰王元峯道人朱俊柵校

賜進士知蒲州事分寧鳳隅山人陳以朝訂

三顯密雙辨者若雙依顯密二宗修者上上根也。謂
心造法界帝網等觀。口誦准提六字等呪。此有二類。
一久修者顯密齊運。二初習者先作顯教普賢觀已。
方乃三密加持。或先用三密竟。然後作觀。二類皆得。
余雖下材。心尚顯密雙修。故仁王般若陀羅尼釋并

仁王儀軌皆云。若不修三密門。不依普賢行願。得成就者。無有是處。又華嚴經字輪儀軌云。夫欲頓入一乘。修習毗盧遮那法身觀者。先應發起普賢行願。復以三密加持身心。則能悟入文殊師利大智慧海。是知上根。須要顯密雙修。中下之根。隨心所樂。或顯或密。科修一門皆得。然顯圓華嚴諸佛共讚。菩薩同遵。西天東夏。上智上賢。無不歸心。爲大教廣行人。多見聞。不假讚揚。密圓神呪。是諸佛之頂。菩薩之心。功能廣大。利樂無邊。爲時流少知。今略叙述。亦分爲二。一

叙述密呪功德深廣。二問答密呪法器勝劣。且初叙述密呪功德深廣者。粗依聖教。略出十門。廣有無量。爲人多不知。密教深勝。故以十門讚揚。用警未聞。若實一向捨顯讚密。亦非通人。華嚴經云。受一非餘。魔所攝持。勸諸後學。若顯若密。或性或相行。則住在一門。信須圓通。無碍。勿同盲人摸象。弟子洗足。余曾有偈云。大聖親宣五教文。千門萬戶入天真。遍觀受一非餘者。盡是佛家不了人。又旣准提摠攝二十五部。即知已下十門。

皆說准提陀羅尼功德也

一護持國王安樂人民門 二能滅罪障遠離鬼神
門 三除身心病增長福慧門 四凡所求事皆不
思議門 五利樂有情救脫幽靈門 六是諸佛母
教行本源門 七四眾易修金剛守護門 八令凡
同佛如來歸命門 九具自他力現成菩提門 十
諸佛如來尚乃求學門 初護持國王安樂人民門
者謂秘密藏諸陀羅尼經皆說陀羅尼能護持國王
安樂人民故寶星陀羅尼經云一切國土中所有隨

羅尼流行之地令人王常得擁護勢力自在亦能
擁護王之政化所有王子妃后宰相輔臣諸官將等
皆得擁護令獲安樂國中所有內外怨敵謀計奸詐
疾疫飢饉亢旱水滂惡獸毒龍如是一切不祥之事
皆悉斷滅復令財穀豐饒庫藏盈溢花菓榮盛人民
安樂又寶藏陀羅尼經說陀羅尼流行之處能擁護
國王王子妃后公主百寮輔相令其災難消滅所願
圓滿善神加護不令鬼魔來相統惱復於國內獲十
種果報一國中無他兵怨賊侵嬖二國中無諸星宿

變恠而起災患。三國中無惡鬼神行諸疾疫。善神衛
護萬民安樂。四國中無諸風火霜雹等難。五國中人
無怨家得便。六國中人不爲諸魔所逼。七國中人無
諸橫死。八國中五穀成熟。甘菓豐足。九國中善龍入
境。依時降雨。無有旱澇不調之名。十國中人不爲虎
狼兇獸諸惡雜毒損害。又七佛神呪經云。陀羅尼若
日月失度。能使正行。穀米不登。能使豐登。大臣謀反
惡心自滅。疾疫刀兵。悉能攘之。又云。其諸人王欲得
現世安樂。離衆患難。其王應當勤心讀誦陀羅尼。亦

當勸於后妃。姝女諸王子等。勤心修習。又守護國界
主。陀羅尼經云。何以偏說護於國主。謂國主若安樂
時。萬民安樂。是以偏說護於國主。葉衣觀自在菩薩
經云。陀羅尼能除一切有情災禍。疾疫飢儉。劫賊刀
兵。水旱不調。星宿失度。亦能增長福德。國界豐盛。人
民安樂。國王男女皆得長壽。又蘇婆呼童子經云。離
真言外。更無別法。能與衆生樂者。廣如諸陀羅尼經
中說之。昔有大遼國。天佑皇帝。法輪廣運。佛慧流通。
堅持密呪。聿獲神功。遂得禾登九穗。麥秀兩岐。寶祚

恒安兆民永樂斯乃陀羅尼之驗也

二能滅罪障遠離鬼神門者謂菩提場莊嚴陀羅尼經最勝揔持經樓閣陀羅尼等二十餘本經皆說若書寫陀羅尼置佛像中塔中杵中或書在幢上堂殿上或紙素竹帛上或桦皮牆壁板木等上有衆生得覩視者或身手觸者或影中過者或真言字上塵飄在身者又或書之戴在頂上者身上者衣中者或書之幡上若風吹幡動其幡所指處衆生或書鐘鼓鈸鐸螺鈸等出聲物上有聞聲者此上來所說諸衆生

等縱有五無間之罪諸佛不懺之業悉皆滅盡來世生諸佛國何況親誦持者故昔人云五無間之極豐應念雲消十惡業之巨愆繞聞霧散又隨求頌云縱犯波羅十惡罪煞阿羅漢及尊親五逆根本七無遮應念隨聲並消滅真言聖力功無量故我稱讚不思議又末法中一字呪等諸陀羅尼經說持呪者於四方面五百驛內諸惡星曜鬼神天魔等盡皆馳散而去有發善心守護者不去若有固爾不去作障礙者便令頭破百分身心粉碎由是行者無諸魔障得至

心要集 卷下 五
菩提問曰。有人言持呪者能惹魔障。今何却說能離魔障。答曰。此是閻巷之談。聖教無文。今密部諸經皆說陀羅尼能離魔障。且置勿論。如顯教法華經中。恐有講誦修習法華者。有魔障起。故說陀羅尼品。令除惡魔。故彼經云。若不順我呪。惱亂說法者。頭破作七分。如阿梨樹枝。又釋摩訶衍論。令坐禪人須得誦呪除魔。又止觀云。若諸魔障惱亂坐禪行者。當誦大乘方等教中諸治魔呪。若出禪時亦當誦呪。又金光明經說十地菩薩。尚以呪護持。何況凡夫。故首楞嚴經

云。若不持呪而坐道場。令其身心遠諸魔事。無有是處。又云。末世衆生樂修三昧。恐同邪魔。應當勸令持我神呪。若未能誦。寫於禪堂。或戴身上。一切諸魔所不能動。如是等文。藏教彌多。現見世人被鬼神惱害。持呪者尚能除得。況於自己敢惱害耶。

三除身心病。增長福慧門者。謂聖六字陀羅尼經。普賢陀羅尼經。文殊一字呪等。十五餘本經。皆說真言行人能除種種身心病。苦言身病者。所謂一切熱病。冷病。風病。瘡病。眼病。耳病。鼻病。舌病。口病。齒病。唇病。

喉病。面病。頭病。項病。背病。脅病。腹病。手病。背病。脊病。臍病。髀病。膝病。脚病。痔病。痢病。痰病。氣病。痲病。疔病。腫病。斑病。疥病。疱病。癩病。癰病。瘡病。狂病。癲病。癩病。鬼魅病。舉要而言。或四大種種病。或五臟種種病。或鬼神所作種種病。或宿業所感種種病。如是等病。以神呪不思議力。悉能除愈。故持句神呪經大悲心。陀羅尼經皆云。陀羅尼能令枯木還生。花菓況有情。病而不除也。

問曰。真言行者。許加持鬼神。療他人病。不答。謂妙臂童子經。蘇悉地經等。皆云。若求上品大成。就事。不得用真言。加持鬼神。禁諸蟲蛇。療他人病。作此能妨大事。後學宜依佛語。識之。識之。若實大悲深廣。懷菩薩心。不在所遮。故繡索經云。除鬼神病。須三業清淨。具慈悲心。此諸菩薩方能為之。

又一切貪嗔癡心病。自然消滅。故白傘蓋陀羅尼經云。若有宿習貪心。等不能除滅。應當一心誦我神呪。如摩登伽女。與阿難。是曩劫恩愛。以我呪力。愛心未

斷成阿羅漢。彼是媯女無心修行。神呪眞寶。速證無學。何況本心求菩提者。又大悲經云。志心稱念陀羅尼。媯欲火滅。邪心除。又如意輪等諸陀羅尼經說。眞言行人現能增長一切福慧。凡所出言。人皆信受。所用衣物財寶等。舉意從心。能令五百由旬內人。天鬼神盡來歸仰。又自然通曉一切經律論。并世間典籍。或得揔持不忘。日記千頌。故大佛頂經云。若讀若誦陀羅尼者。此諸衆生。縱其自身不作福業。十方如來所有功德。悉與此人。又云。若持神呪不生疑悔。是善男子。於此父母所生之身。不得心通。十方諸佛便爲妄語。又云。未精進者。令得精進。無智慧者。令得智慧。等云云。如世間藥餌。尚能令人去除睡眠。增長精神。豈況神呪不生智慧耶。

又不空羅索神呪心經云。若有四衆受持齋戒。專心持誦神呪七遍。不雜異語。當知是人現世定得二十種勝利。云何二十。一者身無衆病。安隱快樂。二者由先業力。雖有病生。而速除愈。三者身體柔粟。皮膚光澤。面目鮮明。四者衆人愛

敬。五者密護諸根。六者多護財寶。隨意受用。七者所有財寶。王賊水火不能侵損。八者所作事業皆善成辦。九者所有種植。不畏惡龍霜雹風雨。十者若有稼穡災橫所侵。持誦神呪加持。灰或水經七遍。已於其田中八方結界。上下散灑。災橫。余時皆即除滅。十一者不爲一切暴惡鬼神羅刹等。吸奪精氣。十二者一切有情。身聞歡喜。愛樂尊重。常無厭足。十三者常不怖畏。一切怨讐。十四者設有怨讐。速自消滅。十五者人非

人等不能侵害。十六者瘡魅呪詛。蟲道不著。十七者煩惱纏垢。不數現行。十八者刀毒水火不能傷害。十九者諸天善神常隨衛護。二十者生。生不離慈悲喜捨。又十一面觀世音神呪經云。若有淨信善男子善女人等。誦持神呪者。現身獲得十種勝利。何等爲十。一者身常無病。二者恒爲十方諸佛攝受。三者財寶衣食受用無盡。四者能伏怨敵而無所畏。五者令諸尊貴恭敬。信言。六者蠱毒鬼魅不能中傷。七者一切刀杖

所不能害。八者水不能溺。九者火不能燒。十者終不橫死。

四凡所求事皆不思議門者。謂觀自在儀軌經。文殊師利儀軌經。一字頂輪等十餘本經。皆說真言行人求成就時。用四種物。一者弓箭鉞斧鈎輪杵鏡。或數珠。餅鉢袈裟等。僧家所用種種之物。二者雄黃雌黃等種種藥物。三者取河岸上土和泥。作師子象馬牛。馳或鷄鵝孔雀金翅鳥等種種禽獸之形。四者或塑畫彫刻種種佛菩薩明王等形像。隨心所樂。科作一

事。依法成已。而置壇中。如法誦呪。若得火焰出時。或手執。或塗身。或乘之。與助伴知識。飛騰虛空。或有人見成就者。或成就者見彼人等。摠得騰空遊諸世界。供養諸佛菩薩。皆壽命一劫。獲初地百法明門。若煙出時。依前用之。得諸仙中。爲王住壽萬萬歲。若煖氣出時。得一切人天敬愛。所求如意。此是上中下三品成就相也。

若火光出。上品煙出。中品煖氣出。下品也。又云。若火光現。得一切呪神常來擁護。八部之衆皆

常恭敬。一切神呪用之。皆得最勝靈驗。若煙相現。隨所去處。而無障難。所求隨心。若煖氣現。得一切諸人。并鬼神等。同心敬愛。

西方有一人。得上品成就。引五百人昇空。如此方淮南王藥。就鷄犬舐鼎。皆得昇空。故昔人云。淮南成道。犬吠雲中。玉喬得仙。劍飛天上。藥力尚小。況佛不思議。呪耶神變。疏云。人手執仙方。未曾和合服用。却謗白日昇空者。以爲虛談。全成不可。又大教王等。諸陀羅尼經說。或令人追龍女爲妻。降藥叉作奴。執絹索

入脩羅宮。呪死屍。令開伏藏。或說成於聖藥。或說勅於財寶等云云。顯教之中。此事罕聞。故先德云。三乘教外。別有持明是也。問曰。諸佛本意。令斷貪嗔等。何却令人起貪心。求世事名利等耶。答云。諸佛有不思議度生方便。謂有衆生不肯直求菩提。且隨其所樂。令持呪求之。由神呪不思議力。所求之事。盡得遂心。一切罪業。亦得消滅。自然超凡入聖。如小兒有病。不肯服藥。被有智醫人。塗在母乳。其小兒本食母乳。不覺服著良藥。除却病苦。故絹索心呪經云。若有衆生

設以諂曲爲求富貴名利等。得聞此呪。彼諸衆生生處。成就智慧福聚之香。神變疏云。真言境界。十地菩薩尚非其境。況生死中人乎。

有人云。陀羅尼多。令人有所希求。反損陷衆生者。此是離求外。別取無求。全同斷見外道。今佛教說終日求之。不見求相。是真無求。非同木石。全不希求也。故觀音鈔云。雖念念求而無能求。所求之相。又況諸佛大慈大悲。豈可故意損害衆生。

五利樂有情。救脫幽靈門者。謂大寶樓閣經。大悲心經。牟梨呪等十五餘本經。皆說若有衆生得見持呪人身者。或聞語音者。或影中過者。盡滅十惡五逆之罪。來世生諸佛國。又持呪人眼所見者。身所觸者。諸有情等。亦滅一切罪。來世生諸佛國。又持呪人路行。有風吹衣。此風已去。所吹者。或江河中洗身。此水已去。所漂者。或天雨時。仰空誦呪。其雨滴所露者。或山頂上誦呪。盡自所覩處。如上所說諸衆生等。皆得滅一切罪。來世生諸佛淨土。蓮花化生。如世間有毒藥。

處下風過者觸著風時便致損傷尚有難測功力況
不思議神呪耶。又繡索經說若聞陀羅尼而生毀謗
者亦獲利益。如人惡心入龍腦梅檀等林中斫截踐
踏龍腦樹等其人亦身惹香氣故佛頂頌云神通勝
化不思議。陀羅尼門最第一。又無垢淨光經云空繡
索經佛頂尊勝經隨求經等皆說若亡人廣造惡業
死墮三塗真言行者即稱亡人名字專心誦呪亡者
應時得離惡趣生於天上。又以真言呪土砂或蓮華
散亡者墓上屍上亡者即得生於諸佛淨土。又亡人

衣物或身分骨肉等得持呪人影映著亦得生諸佛
國。又書陀羅尼置亡人骨上屍上亡人即得生於天
宮。故先哲云塵飄影爍神翫天宮土散水霑識分惡
趣。問曰亡人造業既成已墮三塗之中云何真言行
者或稱亡人名字或呪土砂置屍塚上便令亡人轉
惡道苦得佛國樂耶。非唯俗士懷疑兼乃緇流難信。
答云智者以譬喻得解今舉喻況之。如世禁呪之人
禁火不燒禁刀不斫禁地不螫尚能變有毒而作無
毒豈況如來神呪不能改苦得樂耶。又如列子書說

師文善彈琴。正當春時而叩商弦。以召南呂。涼風摠至。草木成實。

商金音。屬秋。南呂八月律。由得秋氣。草木成實。正秋而叩角弦。以激夾鍾。涼風徐迴。草木發榮。

角木音。屬春。夾鍾二月律。由得春氣。草木榮華。當夏而叩羽弦。以召黃鍾。霜雪交下。川池暴凍。

羽水音。屬冬。黃鍾十一月律。得冬氣。故凝陰凍。及冬而叩徵弦。以激蕤賓。陽光熾烈。堅冰消散。

徵火音。屬夏。蕤賓五月律。得夏氣。故堅冰消散。

此是世間彈琴之術。尚能變秋作春。更冬爲夏。況如來大不思議神呪。豈不能改惡道苦得佛國樂耶。又莊子云。六合之外。聖人存而不論。華嚴經說十地菩薩。一舉足量智功德。九地菩薩不能知。況我如來是諸聖中王。所有秘密心印。豈可以凡夫妄情而欲籌量者哉。其猶井坎之魚。爭知東海之深廣也。唯宜諦而信之。故觀世音菩薩秘密藏神呪經云。若有受持神呪之者。凡有所作。必得成就。唯須深信。不得生疑。持呪之者。既能利樂有情。救脫幽靈。准千手千

眼觀世音菩薩大悲心陀羅尼經說其持呪人
不受十五種惡死。一者不令其人饑餓困苦死。
二者不爲枷禁杖楚死。三者不爲冤家讐對死。
四者不爲軍陣相殺死。五者不爲虎狼惡獸殘
害死。六者不爲毒虵蛇蝎所中死。七者不爲水
火漂焚死。八者不爲毒藥所中死。九者不爲蠱
毒所害死。十者不爲狂亂失念死。十一者不爲
山樹崖岸墜落死。十二者不爲惡人厭魅死。十
三者不爲邪神惡鬼得便死。十四者不爲惡病
纏身死。十五者不爲非分自害死。又不空絹索
神呪心經說誦呪之人。臨命終時獲八種勝利。
一者臨命終時見觀自在菩薩作苾芻相來現。
其前歡喜慰喻。二者安隱命終無諸苦痛。三者
將捨命時眼不反戴。口無欠味。手絕紛擾。足離
舒捲。不泄便利。無顛墜牀。四者將捨命時住正
憶念。意無亂想。五者當命終時不覆面死。六者
將捨命時得無盡辯。七者既捨命已隨願往生
諸佛淨國。八者常與善友不相捨離。又十一面

心要集 卷一
觀世音神呪經說誦呪之人得四種功德。一者
臨命終時得見諸佛。二者終不墮諸惡趣。三者
不因險厄而死。四者得生極樂世界。

六是諸佛母教行本源門者。謂一切諸佛皆從陀羅
尼所生。樓閣經云。真言是諸佛之母。成佛種子。若無
真言終不能成無上正覺。又三藏教盡從陀羅尼所
出。故最上大乘寶王經中說有四乘。一聲聞乘。二緣
覺乘。三方廣大乘。四最上金剛乘。謂陀羅尼藏是也。
一切法皆從金剛乘陀羅尼中流出。神變鈔云。千流

萬派。起自崑崙積石之山。十二分經。出乎揔持秘密
之藏。又萬行揔從陀羅尼所流。謂真言中每一一字
全是無相法界。萬行無不從法界所流。故持明藏儀
軌經云。唵字即是無相法界。神變疏云。無相法界全
是真言。真言全是無相法界。又真言亦名三藏。有持
呪者皆號三藏。謂真言中每一一字皆含戒定慧三。
且萬行不出六度。六度不離三學。既真言名三藏。即
知真言揔含萬行。真言是揔行。其餘法門是支流行
門也。

八要集 卷一
問曰。上引經云。陀羅尼是禪定藏。百千三昧常現前。故今又說真言。摠含三藏。即知真言備含一切禪定之門。何以今時禪者不許持呪耶。答云。准諸傳記。天竺華夏古來禪德。衆善奉行。何況神呪。是無相定門。諸佛心印耶。故白傘蓋陀羅尼頌云。開無相門。圓寂宗。字字觀照。金剛定。又云。瑜伽妙旨。傳心印。摩訶衍行。摠持門。如龍樹菩薩。准傳燈錄。是西天禪宗第十四祖。節畧持明藏經。弘揚准提神呪。一行禪師是中夏聖

人。贊述神變真言。智者禪師得宿命通。廣示持呪軌儀。契符禪師人問最上乘法。直教持誦密言。古來禪師豈不許持呪耶。又禪宗旣說一切諸法。皆是真如。持誦真言。豈非是真如耶。今有或禪或講。見弘密呪。恐失已利。心生嫉妬者。請現在未來。隄防惡報。故佛頂無垢光明陀羅尼經說。昔無垢婆羅門。爲人宣說秘密神呪。有光明長者。先有多人歸仰。恐失已利。而生惡心。與惡心已。便得癩病。受大苦惱。直至命終。墮於無

間大地獄中受苦一劫。又墮傍生中受苦一劫。復生地獄中受苦一劫。方得爲人。生無兩目。以宿緣力再遇無垢婆羅門。作大苾芻。宣說密呪。聞之歡喜。承彼呪力。死生天上等。上說謗之獲益。但有遠益。非無謗罪。如光明長者。是也。蓋爲密呪。是諸佛心印。有無量明王。諸天龍神等護持。致使謗之者。現世多得癩病。奉勸時。流切宜慎之。

七四衆易修金剛守護門者。謂一切四種。但解言語

者。行住坐卧。四威儀中。而易誦習。又但口誦。便是真行。能除煩惱。安樂法身。不假備通教典。如病人得藥服之。便能除病。身安不在廣會醫書。故般若經云。摠持猶妙藥。亦如天甘露。能療衆惑病。服者常安樂。佛預施羅尼疏云。齋戒不稟。而自備果證。不遠而不可消。難獲利。自行化他。因人果人。靡不由此而辦其事。又鼻茶羅疏云。念如來之神呪。心心暗契。如來心。諷菩薩之密言。願願冥符。菩薩願。何生死而不逃。何涅槃而不得。若依餘宗。修行須要廣知聖教。明悟真心。

然後修行方是正行。若未悟而修，皆非正行。如世病人，須要廣知醫書，明閑藥性，方得治病者。即萬中難得一也。是知神呪行門，省略功德甚深。普引七衆，速至菩提，最爲要道。故義淨三藏云：昇天乘龍，役使百神，利生之道。唯呪是親。問曰：夫依顯教，須得依教生信，依信生解，依解起行，行成得果。今密宗神呪，不令生解，但誦持之，便得道果。既越常規，難以生信。答曰：如世間病人，不解醫方，遇神妙藥，而服食之，便得病除，身安。彼既不解藥性，何得病除，身安。世藥尚介，況

如來不思議呪耶。又如來之教，不可以一理推。既言顯密有異，不須一祛。要解起信鈔云：膠柱調絃，全歸愚者。守株待兔，且非智人。唯宜信而持之，速得道果。若不生信，空無所獲。大悲心經說誦持呪者，一切所求皆得果。遂唯除於呪生疑。又云：若有生疑不信，其人百萬劫中，常處惡道，不聞三寶。又諸經說真言行者，四威儀中，有無量天龍八部，諸金剛衆，常守護之。故廣大圓滿無礙大悲心陀羅尼經云：誦持陀羅尼者，是無畏藏。龍天善神，常護持故。又云：若能如法誦

呪即有一切善神龍王金剛密跡常隨衛護不離其
側如護眼睛如護已命。又持呪者若在空中山曠野獨
宿孤眠。是諸善神番代宿衛辟除災障。若在深山迷
失道路善神王化作善人。示其正道。若逢賊陣被他
抄掠墮落他國。善神龍王接還本土。若在山林曠野
乏少水火。龍王護故。化出水火。故彼頌云。龍天衆聖
同慈護。百千三昧頓薰修。又大佛頂陀羅尼經說。設
有衆生於散亂心。口持神呪。常有八萬四千那由他
恒河沙俱胝金剛藏王菩薩種族。一一皆有諸金剛

衆而爲眷屬。晝夜常隨侍衛此人。縱令魔王求其方
便終不可得。諸小鬼神去此善人十由旬外。若魔眷
屬欲來侵擾。是善人者。諸金剛衆而以寶杵殞碎其
首。猶如微塵。恒令此人所作如願。故彼頌云。八萬四
千金剛衆。行住坐卧每隨身。密部諸經廣說護持誦
呪之人。欲要知者。請看藏教。

八令凡同佛如來歸命門者。謂真言行者持誦神呪
課數滿時。身語意三所作善惡之業。皆成無漏功德
法門。故白金蓋頌云。誦滿一萬八千遍。遍遍入於無

相定號成堅固金剛幢自在得名人中佛縱使罵詈
不爲過諸天常聞梵語聲大悲心陀羅尼經云誦持
陀羅尼者口中所出言音若善若惡一切天龍聞者
皆是清淨法音又偈云譬如靈丹藥點鐵成金寶誦
持陀羅尼變凡作賢聖又神變疏云真言行者能令
三業即同本尊三業又持呪行者得諸佛歸命故佛
頂偈云十方世界諸如來護念歸命受持者是也
九具自他力現成菩提門者謂顯教中有自力他力
二門十住論念佛鏡等說一自力門謂修六度萬行

等名難行道如人陸地步行千里程則遲到二他力
門謂念佛等名易行道如人水路乘船行千里程則
疾到今真言中密具自他二力謂大乘寶玉等諸經
中說真言行者日日得具六波羅密圓滿功德又佛
頂頌云不持齋者名持齋不持戒者名持戒僧破二
百五十戒比丘尼犯八波羅聞念佛頂陀羅尼便得
具足聲聞戒

彼佛頂疏云菩薩行門隨行則具今不行而備
蓋神呪之力具足萬行斯言不誣矣

則是自力門。又真言中每一一字皆是諸佛全身。末法中一字呪經云。吾滅度之後。變身作此呪等。即是他力門。又諸經說真言行者。現世能成無上菩提。故樓閣經云。我於無量俱胝百千劫。雖行苦行。猶不得菩提。由纔聞陀羅尼。故加行相應。便成正覺。又五字陀羅尼頌云。諸佛本誓。力現成諸聖事。即於一坐中。便成就正覺。又陀羅尼序云。若學蘊於心。即凡夫三業。成功德聚。只於此生。便得菩提。何勞修進多劫。又神變疏判陀羅尼爲大不思議成佛神通乘。謂依餘門成佛。如乘羊馬行千里程。經久方到。依陀羅尼門成佛。如乘神通行千里程。舉意便到。所至處雖無異。所乘法有遲疾也。又餘門成佛。如磨黃石取如意珠。依真言門成佛。如神通力取如意珠。又云。如餘菩薩爲求菩提。雖難行苦行。如救頭燃。經無量劫。尚不能得。如是成就真言行者。不虧法則。只於此生。得菩提也。故神變鈔云。頓超地位。譬之以神通。速離纏痾。喻之以呪術。又大教王經云。若不依秘密課誦修行。終不成於無上菩提也。

心要集 卷下
十諸佛如來尚乃求學門者。如大乘莊嚴寶王經說諸佛亦求神呪。何況凡夫而不持誦耶。故彼經說觀音菩薩一毛孔中有無量國土。無量諸佛菩薩等。普賢菩薩入觀音一毛孔中。經十二年不知分齊。又云。觀音有六字大明陀羅尼。一切如來皆不知其所得之處。因位菩薩云何得知。乃至說蓮華上佛成佛竟。方經歷諸佛求此六字大明等。問曰。佛具一切智。豈不知得陀羅尼也。答有三義。一者表此陀羅尼最勝最深。令人生於尊重。所以言佛不知而自求之。二者

謂權教中佛不能知得圓宗密呪。如小乘極果不能知得大乘深法。三者密宗神呪即體便是圓圓果海。故佛不得如釋大乘論說圓圓果海。佛亦不得。今六字大明准提神呪。即體便是圓圓果海也。

今密部一切神呪。當顯教中所詮法也。實而論之。具舍能所詮一切神呪。說文當顯教中能詮言也。今六字准提。當顯教中果海也。問曰。寶王經只言六字大明佛不知得。云何今說准提佛亦不知得。答云。彼寶王經說六字大明已便說

准提。是知准提同是果海。又佛知佛說者。直言於五部中。佛部所收。今准提獨出五部之外。若非圓圓果海。是何法耶。又問曰。夫真言者。但是能詮言教。即以聲名句文爲體。何得判爲圓圓果海。答云。若作此問。蓋是未知密教宗旨。今密教中秘密神呪。即是所詮之法。一切說文是能詮言。如上已說。又設縱神呪便屬能詮。若申此問。但是小乘之見解也。謂小乘教中能詮言教。多以聲名句文爲體。大乘始教。或以聲名句文

爲體。或以唯識爲體。終教中說以無性真如爲體。頓教之中以絕待真如爲體。圓教中說或以十玄爲體。或海印三昧爲體。彼顯教中能詮之言。尚尔即是絕待真如。十玄門等。況密宗神呪當顯圓中一真法界耶。又釋摩訶衍論據生滅門中。能詮之教會相歸性。以真如爲體。或多一心爲體。真如門中。即絕待真如爲體。又甚深玄理論不動本源論。此二論中廣畧解說不二果海。當彼二論中能詮之言。以何爲體。以理推徵

即知以不二果海爲體。彼能詮言尚尔。即是不二果海。况今六字大明准提神呪義當彼二論中所詮法耶。又自古諸師皆云。秘密神呪。是諸佛心印。唯佛得知。非因位所解。又今莊嚴寶王經說佛亦不知神呪。若非圓圓果海。是何法耶。願諸學者。虛懷體之。勿滯局情。

問曰。何以圓圓果海。諸佛不得。答云。謂圓圓果海。是本性成就之法表。非是諸佛修因斷障所得故。又表迥出因果之外故。所以言諸佛不得。而自求之。據實

而論。諸佛皆知得也。故賢首云。性德果海。即十佛境界是也。問曰。六字大明准提神呪。既是圓圓果海。即是十佛境界。何以凡夫而得持誦。答云。今密教中說。以真言不思議力。令凡夫三業同如來三業。而得持誦。又密宗神呪。若據所知所解。即唯是諸佛境界。今因位凡夫。雖非知解。但當持誦。自然滅障成德。超凡入聖也。斯之一義。語驚俗聽。理越常情人。既罕聞庸流。難信博學上智。細而詳之。於上三義。任情取捨。上來十門。略述密部。盡依經典。非是下愚能知密旨故。

神變鈔云。金剛手方可探其曠。蓮花眼始能窺其奧。
 二問答密呪法器勝劣者。問曰。上之十門盡叙述圓
 教中真言。為當一切真言而有勝劣。五教各不同耶。
 為復一切真言而無勝劣。皆是圓教耶。答云。准神變
 疏而有二門。一隨他意門。一切真言而有勝劣。諸部
 不同。又清涼疏主於經律論三藏之外。立一雜藏。收
 陀羅尼而成四藏。三乘各四。成十二藏。既三乘中各
 有陀羅尼。例知五教下亦各有密呪也。如諸阿含經
 中呪。即是小教。諸般若經中呪。即是始教。金光明經
 中呪。即是終教。楞伽經中呪。即是頓教。大乘莊嚴寶
 王經中六字大明准提神呪。即是圓教。

又上來十門中所引諸陀羅尼經。多是圓教。

梵語陀羅尼。此云揔持。即以教理行果四法為體。五
 教中陀羅尼。各揔含攝當教中教理行果也。

五教勝劣。今舉喻况之。令初學易知。一小教如
 鐵。二始教如銅。三中教如銀。四頓教如金。五圓
 教似如意珠。

二隨自意門。一切真言更無勝劣。皆是毗盧遮那大

不思議秘密心印

一代教中乃至鬼神所說真言皆是毗盧遮那
如來欲普門益生全體變作彼鬼神類而說真
言非實鬼神能說真言餘類皆尔

又賢首清涼以義判教一經之中容有多教即知一
切經中真言皆是圓教一切真言名摠持者能摠含
攝無盡教理行果也實而言之雙用二門妙契佛心
故神變疏云真言行者能於差別中解無差別義於
無差別中解差別義當知是人於真言相也問曰

上說密部包廣包深難思難議未審此法被何根器
答云所被根器亦有二門一就隨他意門真言既有
五教不同根器亦乃五種各異五教中陀羅尼各摠
被當教中上中下三根也故曼荼羅疏中亦說陀羅
尼通被勝劣諸根二就隨自意門一切陀羅尼皆被
不思議圓根故佛頂頌云神通勝化不思議陀羅尼
門最第一今有未曾鑽仰密教者多云陀羅尼藏唯
被下根斯言甚謬且諸經中說陀羅尼或名最上乘
或名無上乘或名金剛乘或名不思議乘豈可唯被

下根耶。故清涼云。以淺爲深。有符理之得。以深爲淺。有謗法之愆。冀諸學者。切宜留心。不得固執先聞而生輕忽。五天中夏。顯密雙明。方是通人。上來顯密雙辨竟。

四慶遇迷懷者。謂如來一代聖教。不出顯密兩門。

仁王經鈔云。如來一切教。不越顯密兩宗。

於顯教中。雖五教不同。而華嚴一經最尊。最妙。是諸佛之髓。菩薩之心。具包三藏。摠含五教。

梵本有十萬偈。此方已翻譯者。或八十卷。六十

卷。四十卷等。雖文義廣博。其中最津要者。唯別行普賢行願品一卷經文。是華嚴之關鍵。修行之樞機。可讚可崇。西天道流。無不依之。修行也。於密部中。雖五部有異。而准提一呪。最靈最勝。是諸佛之母。菩薩之命。具包三密。摠含五部。

梵本有十萬偈。此方已翻譯者。有諸師諸本。雖儀式稍異。其中最綱要者。唯大唐善無畏三藏所譯一卷經文。是諸壇之領袖。七衆之藥餌。可傳可尚。東夏高德。無不依之。持誦也。

今此兩宗准纂靈記并義淨傳說自如來滅度已後
時人不聞不知。不聞顯圓至龍樹菩薩七百年中出
世雙弘顯密圓宗方乃流行人世今居末法之中得
值天佑皇帝菩薩國王率土之內流通二教一介微
僧幸得遭逢感慶之心終日有懷似病人逢靈丹妙
藥窘夫得如意寶珠喜躍不已形於詠言乃成頌曰
數年何幸頓忘愁 顯密雙逢稱所求
五部神功功可賴 十玄妙觀觀無休
音高音下真言轉 身去身來華藏遊

法界眾生歡喜事

只疑都在我心頭

顯密圓通成佛心要卷下終

心要集

卷一

二十九

圖



南唐書